



ADMINISTRACIÓN LOCAL

PROVINCIAL

DEPUTACIÓN PROVINCIAL DA CORUÑA

Servizo de Acción Social, Cultural e Deportes. Sección de Servizos Sociais

R.P. 2021/8513. Aprobación das bases do XII Concurso de Viñetas “Moito por cambiar”, ano 2021. Conmemoración do 8 de marzo de 2021, Día da Muller

R.P. 2021/8513- Aprobación das bases do XII Concurso de Viñetas “Moito por cambiar”, ano 2021. Conmemoración do 8 de marzo de 2021, Día da Muller.

XII CONCURSO DE VIÑETAS: “MOITO POR CAMBIAR”, ANO 2021. CONMEMORACIÓN DO 8 DE MARZO 2021, DÍA DA MULLER

BASES

1. Obxecto.

O obxecto do certame é empregar a viñeta, ou tira de viñetas (como máximo 6 viñetas) para que o alumnado reflexione sobre os efectos e impactos da COVID-19 no conxunto da sociedade, especialmente no relativo a sustentabilidade da vida que reclama novas demandas sociais e cambia as prioridades, e cómo éstas inflúen de forma desigual na vida das mulleres.

2. Participantes.

Poderán participar todas as persoas físicas, con idades comprendidas entre 12 e 18 anos, de calquera nacionalidade, que se presenten individualmente ou en grupo.

Cada participante/s só poderá presentar unha única obra orixinal e inédita, escrita en galego e non premiada con anterioridade.

Non poderán participar as persoas que fosen premiadas con anterioridade neste concurso.

3. Temática.

Os traballos presentados versarán sobre:

- O factor multiplicador da COVID-19 na precariedade laboral, feminización da pobreza, das necesidades de coidados ao longo da vida, dos efectos negativos sobre a saúde física e o benestar emocional, das violencias machistas.
- A transversalidade e a interseccionalidade. A actual crise sanitaria por mor da COVID-19 fainos reflexionar sobre as desigualdades de xénero ante as novas demandas e prioridades. Esta reflexión podemos facela desde un enfoque transversal e interseccional analizando como son os efectos nas mulleres tendo en conta a idade, etnia, xénero, diversidade sexual, discapacidade, clase social, etc.
- A investigación de como as medidas acordadas para a contención da crise sanitaria poden ser causantes de consecuencias económicas e sociais que afectan de forma desigual aos homes e as mulleres. Podemos analizar os efectos nos sectores produtivos feminizados, o impacto do confinamento a nivel produtivo, persoal ou familiar, indagando sobre o sistema e sobrecarga dos coidados, a corresponsabilidade, as consecuencias no desemprego feminino, o sistema sanitario, a fenda salarial, a conciliación ou desde o cuestionamento e efectos do teletraballo, entre outros.
- Visibilización e recoñecemento do papel das mulleres no desenvolvemento económico e social nesta pandemia, analizando a súa actuación desde a primeira liña.
- Propostas de cambios e transformación social na vida das mulleres e homes, a dignificación dos traballos esenciais para a vida, as redes de axuda, os grupos de apoio social, etc.

Os textos empregados deberán respectar os principios da lexislación vixente en políticas de igualdade de xénero e de prevención da violencia de xénero.

4. Formato.

A viñeta poderá presentarse en formato, como mínimo DIN A5 e como máximo en DIN A4.

A historia poderá estar composta por unha viñeta ou por un máximo de seis viñetas cun fío condutor.

Poderá empregarse a técnica libre.

A execución do traballo poderá ser manual ou dixital.

A obra presentarase en soporte físico de papel. A obra non poderá ir asinada co nome.

O idioma empregado será o galego.

5. Premio.

Poderase participar en dúas categorías:

CATEGORÍA A (idades comprendidas entre os 12 e 14 anos).

Outorgarase primeiro, segundo e terceiro premio.

Primeiro premio: consistirá nun iPad e unha colección de cómics.

Segundo e terceiro premio: consistirá nunha TABLET e unha colección de cómics.

CATEGORÍA B (idades comprendidas entre os 15 e 18 anos).

Outorgarase primeiro, segundo e terceiro premio.

Primeiro premio: consistirá nun iPad e unha colección de cómics.

Segundo e terceiro premio: consistirá nunha TABLET e unha colección de cómics.

As persoas premiadas poderán recibir na entrega de premios un recordo da súa participación no concurso.

A Deputación reserva o dereito a facer uso das obras, o que implica a cesión dos dereitos de autora ou autor para que a institución poida empregalas en calquera campaña de sensibilización e información das actividades da Deputación da Coruña relacionadas co fomento da igualdade de xénero.

6. Prazo e forma de presentación dos traballos.

Prazo.—O prazo de presentación de solicitudes determinarase no anuncio de publicación da convocatoria deste premio no BOP da Coruña, a través do Sistema Nacional de Publicación de Subvencións.

Forma de presentación.—Os traballos entregaranse nun sobre pechado (1); no exterior do sobre indicárase XII Concurso de Viñetas “MOITO POR CAMBIAR”, a categoría na que se presenta (categoría A para persoas de entre 12 e 14 anos e categoría B para persoas entre 15 e 18 anos) e un pseudónimo como identificador do traballo.

Dentro deste sobre irán o traballo e un sobre pechado (2) co pseudónimo no exterior. No seu interior a folla de aceptación dos compromisos e autorización de datos de carácter persoal (anexo 1) cos datos requiridos.

As candidaturas presentaranse no Rexistro Xeral da Deputación Provincial da Coruña (avda. Porto da Coruña 2, 15003 A Coruña) ou consonte co establecido no art. 16.4 da Lei 39/2015, do 1 de outubro, do procedemento administrativo común das administracións públicas, polo que se indicará no exterior do sobre: XII Concurso de Viñetas “MOITO POR CAMBIAR”, Deputación da Coruña.

Os traballos presentados e non premiados non serán devoltos, e poderán ser destruídos a partir do día seguinte ao fallo do xurado.

7. Composición e actuación do xurado.

O xurado estará presidido pola deputada delegada de Políticas de Igualdade e formarán parte del, ademais desta, persoal do Servizo de Acción Social, Cultural e Deportes e dúas persoas de recoñecido prestixio no eido do deseño gráfico, nomeados por ela.

Actuará como secretario o da Corporación ou persoa funcionaria en quen delegue, que será a encargada de abrir o sobre das obras que resulten finalistas.

Para o nomeamento do xurado respectarase a presenza equilibrada de mulleres e homes, en cumprimento do disposto no Capítulo I, artigo 5.2d) do Decreto legislativo 2/2015, do 12 de febreiro, polo que se aproba o texto refundido das disposicións legais da Comunidade Autónoma de Galicia en materia de igualdade. As persoas que integren o xurado estarán

sometidas ao deber de abstención nos casos sinalados no artigo 23 da Lei 40/2015, do 1 de outubro, de rexime xurídico do sector público.

A composición do xurado darase a coñecer, con anterioridade a súa reunión, na páxina web da Deputación (www.dacoruna.gal), co fin de que se poidan interpor, se for o caso, os recursos legais pertinentes.

O xurado actuará en pleno e será necesaria a asistencia de dous terzos dos seus membros. As súas deliberacións serán secretas e delas redactarase a acta correspondente. O réxime xurídico e de funcionamento do xurado será o disposto nos artigos 15 a 18 da Lei 40/2015, do 1 de outubro.

Así mesmo, o xurado poderá declarar deserto o premio e a súa proposta será obxecto de resolución da Presidencia desta Deputación, que é o órgano competente para resolver o premio.

8. Entrega dos premios.

A concesión do premio darase a coñecer a través dos distintos medios de comunicación.

A entrega de premios celebrarase baixo as directrices da Deputación e avisarase ás persoas gañadoras cunha semana de antelación.

9. Normas supletorias.

Non se devolverán os traballos presentados e non premiados. A partir do día seguinte á concesión do premio polo xurado, os traballos non premiados poderán ser destruídos.

A participación nesta convocatoria supón a total aceptación destas bases.

10. Protección de datos.

Os datos subministrados teñen a finalidade de poder tramitar esta convocatoria e están protexidos pola Lei orgánica 3/2018, do 5 de decembro, de protección de datos persoais e garantía dos dereitos dixitais. O responsable do tratamento dos datos é a Deputación Provincial da Coruña, e o encargado será a empresa contratada pola Deputación provincial para coordinar o premio, no caso de se contratar. A lexitimación para o tratamento dos datos persoais contidos nesta solicitude é o consentimento que o asinante outorga á Deputación provincial coa súa sinatura. No caso de que sexa denegado o consentimento para o tratamento dos datos persoais, non poderá presentarse ao premio por imposibilidade de tramitación da solicitude. O destinatario dos datos é a Deputación Provincial que non cederá datos a terceiros, salvo obriga legal. Os datos facilitados conservaranse ata a finalización da tramitación da convocatoria. As persoas que participen na convocatoria teñen os dereitos a acceder, rectificar ou suprimir datos erróneos, solicitar a limitación do tratamento dos seus datos así como opoñerse ou retirar o consentimento e solicitar a súa portabilidade en calquera momento. Estes dereitos poderán exercerse perante as oficinas centrais da Deputación situadas na Avda. Porto da Coruña, 2, 15003 A Coruña, ou ben a través de medios electrónicos, dirixindo un correo ao enderezo delegadodeprotecciondedatos@dacoruna.gal. Pode consultar a política de privacidade da Deputación no enderezo web www.dacoruna.gal/avisos/politica-privacidade.

A Coruña, 10 de marzo 2021.

O presidente

Valentín González Formoso

O secretario

José Luis Almau Supervía

2021/1975